

Lansamento oficial di “Young Entrepreneurs Stichting of Aruba”

Oranjestad — Recientemente a lansa “Young Entrepreneurs Stichting of Aruba” (YES Aruba) oficialmente durante un conferencia di prensa na “Young Entrepreneur Center” na e edificio principal di Aruba Bank situa na Camacuri.

E organisacion YES Aruba ta consisti di un directiva cu Presidente Hashvin Daryanani, miembro di directiva Ramsis Arends, y miembro di directiva Kawish Misier.

Meta di YES Aruba ta pa sostene negoshantenan di empresanan nobo y chikito dor di trece informacion valioso na nan pa yuda nan

haya exito den nan negoshi. “Nos ta hopi contento cu e apoyo di Aruba Bank. Nos ta kere cu YES Aruba por haci contribucionnan real na e comerciantenan nobo aki na Aruba,” Hashvin Daryanani, presidente di YES Aruba a bisa.

E prome evento cu YES Aruba ta organisa lo ta dia diamars, 10 September, 2013, na Renaissance Convention Center pa 5:30 p.m. Na e evento aki YES Aruba lo duna mas detaye di nan organisacion y tambe presenta tres lectura cortico cu informacion importante pa tur negoshante nobo. E oradornan lo ta Edward Erasmus di Free

Zone Aruba kende lo cubri e parti financiero di un negoshi, Guido Picus di Expandeer kende lo duna informacion tocante strategia digital, y Carlos Lopez di Mr. FroYo's kende lo conta tocante su experiencia di cuminsa un negoshi.

Registracion pa participa na e evento aki ta gratis. E evento aki tambe ta wordo patrocina pa Aruba Bank. Pa registra bishita www.yesaruba.org. Ultimo fecha pa registra ta 4 September, 2013. Cuponan ta limita, pues ta pidi esunnan interesa pa registra mas pronto cu ta posibel.

Aruba Bank ta considera



importante pa sostene e negoshantenan aki na Aruba. Gina Habibe, directora ehecutivo na Aruba Bank, ta bisa, “Ta importante pa sostene e negoshinan chikito y mediano, como cu nan ta e curason di e economia di Aruba. Corda cu un compania chikito awe por ta un negoshi grandi mañan. Asina como banco nos ta aporta na e crecemento di nos economia.”

E obhetivo di YES Aruba ta pa yuda stimula negoshinan nobo, pero tambe negoshinan chikito y mediano cu ya ta existente caba. Nan lo organisa “think tanks” pa crea ideanan nobo pa comerciantenan, organisa sesionnan di “networking” entre negoshantenan nobo y otro partidonan relevante. YES Aruba lo stimula relacionnan di “mentor” entre negoshantenan nobo y esunnan cu mas experiencia. Nan lo organisa eventonan pa presenta negoshinan nobo cu ta drelando e mercado.

Tambe YES Aruba lo busca na influencia decisionnan pa yuda facilita y stimula sostenibilidad y crecemento di negoshinan aki na Aruba. YES Aruba kier contribui pa yega na un ambiente economico sta-

biel cu ta crea oportunidadnan saludabel pa desaroyo di negoshinan nobo.

YES Aruba a nace pa motibo di falta di un plataforma unda comerciantenan nobo por intercambia ideanan y experiencia. Durante e prome evento di National Council for Innovation and Competitiveness (NCIC) na aña 2011, co fundado di YES Aruba, Kawish Misier, a bin riba e concepto pa funda un “network” pa doñonan di negoshi chikito pa asina por mehora relacion y intercambia experiencia cu otro.

E idea aki a wordo mencionan na un di e oradornan di e evento, Joyce Bartels-Daal, kende di biaha a trece tur e comerciantenan nobo hunto y a introduci nan na otro.

Desde e evento aki e comerciante hobennan aki a sigui topa tur siman pa desaroya e concepto y pa yuda otro. Awor, dos aña despues YES Aruba ta un fundacion oficial cu e meta pa mehora y inspira cualkier persona cu a cuminsa nan propio compania recientemente.

Pa haya sa mas tocante YES Aruba y nan eventonan cu ta na caminda por favor bishita nan website na www.yesaruba.org. □